

EUSKAL PRENTSA. Datorren urteko udaberrirako amaitua izango da Martin Ugalde Kultur Parkearen lehen fasea

EGUNKARIAk egoitza berrituan igaroko du gaur bere 11. urteurrena

Hil honen amaierarako bukatuko dira euskarazko kazetaren bulego guztietako lanak

I. Petxarroman | DONOSTIA

Erosotasuna, garbitasuna, argitasuna, txukuntasuna... ezau-garri horiek guztiak biltzen ditu EGUNKARIAren erredakzio berri-tuak. Jadanik zaharberitutako egoitzan ari dira lanean euskarazko kazetako langileak. Oraindik lanak guztiz bukatuta ez badaude ere, bulego batzuetan falta diren lanak aurki amaituko dituzte, eta, aurreikuspenen arabera, abenduaren amaierarako prest izango da EGUNKARIAren egoitza berria oso-osorik, Joanmari Larrarte Martin Ugalde Kultur Parkeko lanen koordinatzaile eta EGUNKARIAko kanpo harremanetarako arduradunak adierazi duenez.

Parkeko lehen fasea, berriz, udaberri aldera amaitzea espero dute. Hala, egoitzak alokatzen hasi ahal izango da kultur parkeko enpresa kudeatzailea, Buruntzape SL enpresa. Hain zuzen ere, EGUNKARIAk, Zabal-tzen-Euskal Kulturgintzak eta Graficas Lizarrak osatzen dute aipatutako enpresa.

Lehen fasea amaituta, parkeko lehen faseari dagozkion 7.000 metro koadro eraikita egongo dira, eta orduan hasiko dira gainerako 6.000 metro koadroko eraikuntzekin.

Hasiera Lasarte-Orian

Gaur duela 11 urte kaleratu zen EGUNKARIAren 1. zenbakia. Lasarte-Orian Antzaren egoitzako eraikin batean zuen erredakzioa orduan EGUNKARIAk, alokatuta. 1994an Andoainera pasatu zen erredakzioa, Laborde enpresa zaharraren egoitzetara.



GARI GARAIALDE

EGUNKARIAren erredakzioa eta teknikarien gela, atzo hartutako irudi batzuetan.

EGUNKARIA INTERNETEN

Gero eta eduki eta zerbitzu gehiago sarean

EUSKALDUNON EGUNKARIAK ahalegin handia egin du azken urtean Interneten duen web orrian informazioak eta zerbitzuak ugaltu eta hobetzeko. Iaz bezala, aurtun ere, egunero izan da sarean eguneroko kazeta. Horrekin batera, azken hilabeteotan herri informazioa jarri du Interneten EGUNKARIAk. Herria aldizkariak Zuberoa, Nafarroa Beherea eta Lapurdiko herriei buruz ematen duen informazioa, *Nafarkaria* aldizkariak Nafarroari buruz ematen duena eta *Bizkaia* eguneroko gehigarriak Bizkaia buruz ematen duena aurki daiteke Interneten egunero.

Horrez gain, *Bizkaieria* bizkaierari buruzko zerbitzua eskaintzen du euskarazko kazetak Interneten, eta laster batean zerbitzu bera emango du zubererarekin.

Halaber, euskal gatazka-ren eta euskal literaturaren inguruko guneak ere eskaintzen dira Interneten.

Andoaingo hasierako urteak alokairuan igaro zituen, eta 1997an egoitza erosi zuen Buruntzapek. Andoaingo Udaleak eta Gipuzkoako Foru Aldundiak egin beharreko erabilera aldaketak egin ondoren, 2000. urteko urtarrilean onartu zen Martin Ugalde Kultur Parkearen proiektua. Lanak handik gutxira hasi ziren, baina berehala geratu ziren, bi eraikini monumentu izaera eman baitzien Eusko Jaurlaritzak. Iazko udazkenean hasi ziren berriro lanak, gaur arte.

IÑAKI URIA EUSKALDUNON EGUNKARIAKO KONTSEILARI ORDEZKARIA

«Sinesgarritasuna eta eraginkortasun handia lortu ditu EGUNKARIAk»

I.P. | DONOSTIA

11. urteurrenean, Iñaki Uria kontseilari ordezkariak azpimarratu du «sinesgarritasun eta eraginkortasuna» lortu duela EGUNKARIAk.

■ **Zer moduzko urtea izan da 2001a EGUNKARIArentzat?**

Aurtun ahalegin handiena azpiegiturretan egin dugu: egoitza nagusia, Baionako egoitza, kultur parkea... Bestetik, aipagarria da beste pauso handi bat eman dugula herri informazioaren bidean, Tolosaldeko eguneroko produktua egin ez Galtzaundirekin batera.

■ Epe laburrerako helburuak zein dira?

Ekonomia gehigarri bat nahi dugu kaleratu igandeetan, eta *Xingola* 16 orriko bihurtu nahi dugu. Bestetik, ea gai garen beste bailararen batean herri informazioari heltzeko, Tolosaldean egin bezala.

■ Eta epe luzerago?

Herrietako informazioaren apustua sendotzea, eta ikustea ea garapen multimedia baterako bidea zabaltzen zaigun: irrati, Internet, egunkari eta telebistan... Hor dugu erronka

handi bat: irakurleak, entzuleak eta ikusleak irabaziz joatea euskararentzat.

■ Beti aipatzen diren bi kontu: astelehenekoa eta errotatiba.

Lortu gabekoen zerrendan daude, eta jendeari garbi esan behar zaio: astelehenekoa ezinezkoa da diru iturrietan salto handirik ez dagoen bitartean. Bestetik, errotatibari dagokionez, saiatu gara beste lauzpabost egunkarirekin inpresio zentro bat antolatzen, baina ez da atera. Hori horrela, guk ba-

karrik ezin dugu errotatiba bat erosi.

■ Zer azpimarratuko zenuke EGUNKARIAren ibilbideaz?

Duela 11 urte inork ez luke pentsatuko gauden tokian egotea: 50.000tik gora irakurle izatea, 14.000tik gora erosle, 5.000tik gora harpidedun, 4.000tik gora iragarle... Halaber, hasierako filosofian sendo iraun du: euskaltzalea, nazionala, independentea... Sinesgarritasuna eta eraginkortasun handia lortu ditu azken urteotan.